

ferre, ac deuouere conuenit. Hoc ego dies noctesque, vt debeo, cogitans, quum omnem ætatem meam, quæ iam sextum supra quinquagesimum annum superauit, in Philosophiæ studia impenderim, & Aristotelis libris publicè in hac Patauina Academia interpretandis sex & viginti annos iugem operam nauauerim, si quid in ijs studijs, atque in eius muneris functione assiduis laboribus, vigilijsq; profeci, quod quam sit exiguum sentio, id totum non viribus ingenij mei, sed distributori omnium officiorum Deo attribuendum, meque in eius parui talenti dispensatione ministrum, non dominum esse constanter existimaui. Id me mouit, vt hoc naturalium librorum volumen, quod ad vniuersam ferme Aristotelis naturalem Philosophiam explanandam in studioforum vsum edere constitui, primum ad te omnium supremum Sacerdotem deferrem, vt quemadmodum omnia mea studia, omnemq; in ijs profectum meum iam pridem illuminatori mentium Deo accepta retuli, atque deuoui, ita hos laborum meorum fructus tibi CHRISTI veri DEI apud nos Vicariò reuerenter offerrem, & consecrarem. Hoc equidem iam tertio ab hinc anno cogitabam, quando libellum de Naturalis scientiæ constitutione tanquam huius magni voluminis exiguam partem in publicum proferre statuebam; sed veritus, ne gentilium more primitias tantum offerre velle viderer, & indignam ratus tua magnitudine paruitatem libri, qui non vt opus integrum, sed vt magni operis exordium ederetur; tunc satis habui illum Illustrissimi, ac summæ spei adolescentis Alexandri Peretti Cardinalis, nepotis tui patrociniò commendare, tanquam deuotionis meæ pignus, donec totum absolutum opus tuo conspectu dignius redderetur. Hoc igitur vt fortunatum iudicandum est, quòd ei hoc tempore in lucem exire contigerit, quo nactum sit te orbi regendo præfectum à Deo Pontificem, tum Philosophum sapientissimum, maximumq; Philosophorum fautorem, tum Christiana pietate, vitæq; integritate, & omni virtutum genere cumulatifimum, à quo nunc Christiana Respub. expurgatam se omni scelere non absque admiratione confitetur, & gloriatur. Fortunatissimum erit, si à te hilariter exceptum, dignumq; tuo fauore redditum fuerit, impar quidem illud præ sua, auctorisq; humi-